

求恕齋
叢書

雪橋詩話三集

二

I207.
447.

卷一


七

七

七

日知錄集解卷一

七



雪橋詩話三集卷第二

遼陽楊鍾義撰集

吳興劉承幹參校

太宗文皇帝釋奠文廟卽立文館築翔鳳閣以譯書史
儲祕籍卽後來文溯閣之東南閣也實開文治之先翁
正三送賢士直閣往盛京文溯閣庋書云要與麟臺添
故事更瞻鳳閣溯興京

寧武關周忠武遇吉力戰捐軀曹棟亭鐵冠圖總戎別
母一齣觀者無不歔歔忠武曾拒我朝之兵于河西務
太宗臨陣歎曰自登州登陸以來如入無人之境惟

此一戰差強人意耳王梅泚寒夜觀劇偶成詩云擎杯
含淚奉高堂寧武關前血戰場一戰差強人意耳早傳
褒語自 先皇其墓在寧武東門外半山溪流泛濫由
墓南衝激而過黃勤敏謂乾隆乙巳夏大雨浹旬水勢
幾及墓七月墓前土忽墳起二高阜延袤數丈逼溪溜
中趨衝激之患遂已彭甘亭有詩紀異寧武參將府卽
明總兵署木坊上有劉夫人射賊箭彭檀亦香有詩紀
之

禮烈親王從 太祖征哈達平輝發定葉赫等國大破
烏喇軍 太宗朝征蒙古喀扎魯特部敗明師于薊州

遵化圍大凌河城生禽明監軍道張春等嘉慶中宋煥
襄奉題骸箭圖應教云禮烈親王箭傳觀血尙濃乾坤
方失鹿風雨正飛龍霹靂掣天一颼颼穿甲重當時薩
爾滸此物最摧鋒七葉傳孫子河山紀爾庸凌煙大羽
箭洛誥古功宗世守刀同赤言藏弓自彤還聞有戰馬
曹霸亦遭逢王又有所乘戰馬圖也

我朝內宮之制乾清宮交泰殿坤寧宮爲紫微正中坤
寧宮後爲坤寧門門外爲御花園園中奇石羅布佳木
鬱蔥順治丙申高陽李臺書相國以奉安乾清宮牌匾
獲寓目焉有詩云御園清邃接坤寧琪樹千章蔭內庭

絕巘雲霞環紫翠中天簾幕敞青冥奔湍赴沼如鳴玉
怪石陳堦是寶星忽向僊都逢羽客步虛餘韻正泠泠
秦留仙蒼峴山人集恭紀世祖皇帝遺事十首之四
云千騎傳呼簇玉鞍平明西苑朔風寒合圍親射雙雕
落不許降王仰面看離宮閱武及初冬清問還聞下九
重聞粵軍輸憂告匱親將節省命司農封章夕奏早批
朱清書譚經到日晡講幄新移宏德殿天人稱絕董江
都御筆鍾王歎逼真不將戈法借儒臣親摹文敏書千
幅小璽朱鈴掌內人臺書相國頒刻董帖詩熙朝文治
啟芳規舊墨新縑別殿披游藝偶然供藻鑒憐才何必

在同時鑄摹冊府貞珉永頒賜儒林縹帙奇欲效誠懸
論筆法小臣慙未解臨池

順治中特旨修文廟凡再幸學李文勤詩開國崇經術
投戈自得師卽今丹腹跡猶是治平基故老悲軒鼎諸
生泣頻池翠華曾莅止兩度見鴻儀此康熙癸卯文廟
春祭追述之作已酉 聖祖幸學文勤扈從恭紀云八
載垂裳玉燭調臨靡盛典肇熙朝雲開御幄瞻周鼓風
引僊音奏舜韶釋奠已欣光壁水橫經更覩聽圜橋叨
陪劍履隨雕輦不羨崆峒扈蹕遙桐城何采敬輿視學
恭紀六十韻則順治九年作其詩略云南北瞻豐鎬東

西作潤灑衮衣親主鬯朱紱悉陳遵酬酢存兢業威容
中折旋工規無逸誦盟薦有孚攀設几尊彛貴行廚繭
栗銓躬桓欣鳳附冠帶慶蟬聯門闢環橋列池登映壁
圓藜然光倍炯薪燼火猶傳賚及先師肩施于博士員
大成侔覆載遠澤被曾玄曩感章縫遇茲看俎豆延準
今惟酌古裕後實從先更老勤從政公孤領集賢天心
垂易象峻德述堯篇司成進講
乾象堯典綠字超黃絹丹書煥彩
箋禹皋謨自典君父道兼乾至治民爲鑑微辭理易詮
盈虛嚴剝復箴範戒風愆觀昔曾題虎堂寧獨夢鱣履
祥仍疊疊膺服愈拳拳有位咸咨爾諸生共勉旃春溫

敷黍谷朝旭到寒氊啓筭頒宮錦充樞捧賜錢終身期
可荷翹首亦維虔在頒應倅餒臨雍更獻豳屯營投經
藝羽獵息游畋齒胃尊膠序勤農首藉田災荒靡壅聽
綸綍屢俞蠲方富如岡算惟覘卜厥綿緝熙形穆穆駿
惠擯諫謏月屬庚辛令星消彗孛囂中阿瓦械樸時夏
職戈鋌氣靜綏黔蜀聲馳定粵滇搜遺藏匱室闡祕略
蹄筌輒允昌言拜能令異教捐是皆堪鼓吹所重凜冰
淵盛事當難朽嘉儀已告竣舄穿松角過旂向蘗林還
鴈旅連宸共魚麗奏斗邊榮分齊胙賜美詎穎羹專甘
露浮盤浥青絲貯籠鮮盃盛清醴盃饋御庖全浹日

賡周頌瞻雲拂舜弦笙鏞諧節族翟籥舞蹁躑昭代隆
儒術微官近講筵步趨丞相後侍坐聖人前肯構慙繩
武循情願仔肩懿宣懷史克獻賦薄陳騫云云敬輿爲
前明文端公後人已丑進士嘗奉敕纂修通鑑全書館
選錄籍江寧

范文肅生於萬厯丁酉康熙丙午卒年七十高陽相國
秋日城東感事云東北連山亂曉霞城闌初起散林鴉
翟公門客知誰至薤露歌殘望素車黃菊當年醉綺櫺
白楊今日起悲風平生幾許西州淚隔歲清秋此恨同
此送文肅公葬兼感乙巳秋送寧文毅也文毅字備皆

天命閒卽在文館辦事天聰初從征大凌河及察哈爾
有功授世職嘗疏請設言官慎薦舉順治二年任宏文
院大學士丙戌丁亥己丑三典會試其劾溧陽相國略
謂人臣貪酷犯科國家癰疥之疾不足爲慮惟懷奸結
黨禍關宗社患莫大焉陳名夏奸亂日甚黨局且成臣
不憚舍殘軀以報聖主並列其罪狀請鞠訊焉致政十
年先文肅一年卒高陽二公門下士也

世祖幾暇臨池多書語錄有云散盡浮雲落盡花滿天
明月是生涯父慈子孝溪山外萬古清風現舊家書法
之外兼深畫理祕殿珠林石渠寶笈所載不下數十軸

嘗見潑墨山水作於乙未鈴璽一曰廣運之寶 聖祖
御書刻石者有懋勤殿法帖孝經多心經金剛經裴潏
劄子及靖邊帖嘗謂黃庭堅書清勁有秀氣顏魯公書
嚴氣正性可想見其臨難風節於古人墨蹟石刻暇卽
臨摹每日寫千餘字從無閒斷清字敏速從無錯誤批
摺諭旨硃筆親書天亶生知健行不息 世宗御書墨
刻有朗吟閣法帖四宜堂法帖魏徵十思疏 高宗臨
董襍帖題云香光子米書得力最深故其下筆往往別
具神解又云香光書陶鑄各家于二王尤能脫盡官帖
窩曰得其神髓其出入顏米殆與之化題仿倪畫云倪

迂畫在元四家中稱逸品當所謂不從門入者其甥乃
強之爲譜要非談畫理者所能到冬夜乘興快仿一過
並錄圖說於右恍聽霓裳羽衣迴非太常法曲所能譜
但不規規形似作詩必此詩定知非詩人迂叟或當破
顏一笑耳識番馬圖云唐胡環番馬圖久已膾炙藝林
幾暇展玩惜其寫物傳神猶有不到者予東巡吉林北
駐上都于所爲拂廬弓矢之宜牧息漁獵之狀日考究
而勸賞之故約略成此圖以誌漠陲風物非欲與古人
爭勝也六十餘年宸翰眷藻炳耀寰區至拓土紀功其
碑版照於四裔不勝紀矣

周東岡懷陵述感詩新朝置冢戶奉帖歸陵旁元年賜
供田割麥薦享堂劉杜三遇王敬哉宗伯詩有聽說寢
園沾聖澤冬青無用布衣裁之句李容齋景帝廢陵詩
悠悠二百年壞道餘喬松我皇行見之積愀愴宸衷
置守禁樵採毅魄仍幽宮盛德之前代所無楊文叔
翰編孝陵詩鼎湖龍去上天弓劍埋藏四百年金盃
玉魚無恙在不須清淚滴銅仙吳子珍待詔詩艱難王
業感前明十載高皇馬上爭後葉有時耽燕佚中原無
地不戈兵勝朝失鹿悲禾黍真主乘龍致治平二百
年來勞使節諸陵時祭冷榛荆此感豐中京邸感秋之

作有殷鑒之思焉

季滄葦讀史有感云人君勢原孤賴茲受恩臣臣子心
不一何以報一人用賢須光明去奸莫逡巡奈何甞生
殺惟窺笑與顰乃以朝廷爵因親及其親相尋于水火
此屈而彼伸循環在一日計訟如平民不憂河北賊何
地置其身魏石生謂其蒼莽無粉澤似一篇大奏議
新城尚書於明詩推昌穀子業二家布衣則首舉吳非
熊程孟陽謂吳以五言擅場源出於謝宣城何水部意
得處時時近之七言自秦淮鬪草篇而外無頗可采程
七言律學劉文房韓君平絕句出入於夢得牧之義山

古體不逮今體論定爲新安二布衣詩其門人汪于鼎
吳東巖授之梓非熊貧居云釜裏生魚甌裏塵非關久
雨卻關貧牀頭惟有梁鴻傳閒誘荆妻學古人暮春谿
居云漁絲誤罾在浮槎貪看澄波點落花空立磯頭不
成釣無魚人笑晚歸家頗見風趣其論本朝布衣之詩
則以石湖邢昉爲冠邵青門謂松圓詩多墮落旁趣如
風情缸面清明酒節物山頭穀雨茶非村學究對偶耶
不嫌晝漏三眠促方信春宵一刻爭非劇本中花面諢
語乎紙裏已空難愛惜餅儲欲罄未知謀非破窳中落
場詩乎若問揚州舊風月也曾騎鶴貫腰錢非鄭元和

劇落場詩乎遠雁如塵飛水面亂帆疑葉下吳頭夢裏
楚江昏似墨畫中湖雨白于絲牘添風月閒家具憑占
煙波小釣舟非張打油胡釘鉸之瓣香乎松圓爲虞山
所激賞青門素嫉虞山未免詆之太過耳

陳確庵自號七十二潭漁父毛子晉令其二子受業順
治戊戌詮次同志之詩爲之傳記曰離憂集明年己亥
復評次其門弟子之歌詩爲從游集其頑潭詩話則一
時醺唱之作也確庵諸子遜字子謙邀字子莊輿字以
載皆能詩邁字香谷移居膠城之東里有句云涉園未
得淵明趣寄廡還期德曜賢吳鐵庵康侯稱其門庭蕭